



Selasa, 27 Desember 2022

Ogen: 1 Samuel 7:12



"Batu Penampat"



Perdalanan kegeluhen si idalani, melala erbage si man hadapen. Megati kita jumpa keriahen sierbahan ukur senang tapi megati ka nge kita jumpa kiniseran sierbahan ukur ndele. Megati kita jumpa ras jelma si mereken semangat tapi lit ka nge kita jumpa ras kalak si melemahkan dirinta. Kerina si enda mulihken kuga natap ras ngalakensa bage pe pengarapen ras kinitekenta er-Dibata.

Samuel i bas mabai dengen mpersingeti bangsa Israel pe megati ngalaken situasi keriahen dengen kiniseran. Bangsa Israel selaku bangsa si mekeng, bangsa si nambah man berhala-berhala dengen bangsa si megati nilah arah Undang-Undang Dibata. Situasi enda me erbahansa bangsa Israel dengen peti perpadanan Tuhan tading i Kiryat Jearim erkiteken ikuasai kalak Pilistin. Ngerana Samuel man bangsa e, adi atendu mulihken ku Tuhan alu bulat ukurndu, arus ipedauhndu dibata-dibata si deban ras gana-gana Dewi Astarte. I pepulung Samuel bangsa Israel i Mispa guna ertoto man Tuhan gelah peti perpadanan Dibata banci min mulihken ku bas tan bangsa Israel. Situasi enda erbahansa bangsa Israel ngidah maka Dibata si sembahna e me Dibata si mulahi ia arah tabanen bangsa-bangsa si deban si lit isekelewetna.

Pulahna bangsa Israel arah peperangen ras bangsa Pilistin nari igejapken bangsa e bage pe Samuel erkiteken pemasu-masun Dibata. Jenari ibuat Samuel sada batu, itamakenna kelang-kelang Mispa ras Jesana, janah nina, "Tuhan nggo nampati kita seh ku ingan enda" janah igelarina batu e 'Batu Penampat.' Penampat si rehna i bas Dibata nari mpeteguhi dengen mbebasken bangsaNa arah 'peperangen' si lit i doni enda. Persoalen megati lit man alanken, baci saja ngganggu ku bas ketengenen geluhta, tapi si pasti penampat e rehna i bas Dibata nari.